

2243




T


501

SER





VE



inv 2243

L. Golt.

1858

1858

VI 14/12/67

PASQVIL

ANTIPARADOXE.

Dialogue contre le
Paradoxe de la
Faculté du
vinaigre.



A LYON.

1549

cm

1

2

3

4

5

6

7

8

9

10

11

BIBLIOTHEQUE
SAINT
GENEVIEVE

P R E F A C E.



E petit œuvre Intitulé Antipara-
 doxe, Pource qu'il est escript contre
 le Paradoxe du vinaigre, nous auons
 mis en Dialogue, tant pour euer
 ennuy au lecteur: que pour inspirer
 vie a la parolle. Car propos entrecoupez, fâchent
 moins, & recréent plus le lecteur, que l'oraison con-
 tinuelle, tousiours à elle mesme semblable, & plus viue
 est l'interlocution de deux, ou de plusieurs, que l'on re-
 presente quasi vifz, & parlâs, que le languide discours
 d'ung seul parlant sans reclame. Et affin que l'on ne
 nous puisse reprocher, (ce que faict Barptolemaeus Sca-
 la, à Politian,) que nous sommes Hercules cōtrefaictz
 qui nous forgeons des monstres à plaisir, si foibles que fa-
 cilemēt les puissions desfaire. Sache le lecteur que nous
 n'auons rien attribué à la persone de Paradoxoleros,
 que luy n'ayt escript en son liure. Et qui plus est l'auons
 introduict trop mieulx parlant, & argumentant qu'il
 ne faict, & de faict, cōme vrayz chāpiōs, auons baille à
 nostre aduersaire concertateur, meilleures armes que
 les siennes propres, comme assez le pourra cognoistre
 quiconque aura leu l'ung, & l'autre. Nous protestons
 aussi n'auoir escript cecy par nulle malle affectiō, sinon
 pour purger les Medecins Lyōnoys de suspicion de tel
 erreur, qui pourroit sembler estre par eulx approuuée.
 Et que ainsi soit n'auons escript aucune parolle inu-
 ieuse ny touché aulx vices, & mœurs, ou parauēture
 matiere ne nous heust defaillly.

PASQVILANTI- PARADOXE.

Dialogue contre le Paradoxe
de la faculte du vinaigre.

INTERLOCVTES.

Pasquil, & Paradoxoleros.

PASQVIL.



CE que ie voy, tresueritable
est la sentēce de Pline au pre-
mier chapitre du ~~menteneu-~~ ^{vi}
uiesme liure de l'histoire na-
turelle, disant que tous ces
medecins, faictz à la haste,
qui par quelque nouveaulté veulent acquerir
bruyt, & renommée à leur nom, trocquent les
ames, & les vies des hommes.

PARADOXOLEROS.

Qui diable peut estre ce vieil Philosophastre,
auec son baston: qui si plinianement, & plaine-
mēt se courrouce des nouveaulx medecis cher-
chans d'acquerir bruyt? Il me le fault fauoir
por luy rembarrer sa tant braue audace, Car ie
m'en sens aulcunement picqué. Dieu gard Phi-
losophe, ou Morosophe, quelque tu sois,

PASQVIL.

Et toy: le ne say qui.

PARADOXOLEROS.

A 2

Tu ne scez qui? Commēt? es tu seul estrangier
en ces regiōs, & cela tu ignores? N'has tu point
ouy parler de Paradoxologos?

PASQVIL.

Mais bien de Paradoxoleros. Es tu doncq cel-
luy gētil Paradoxeur de la faculté du vinaigre?

PARADOXOLEROS.

Celluy suys ie vrayemēt. Qu'en veulx tu dire?

PASQVIL

Rien aultre certe: sinon ce qu'en dict, & mande
le gentil coq, à lasne sot,

Vng tas de folz, & de gloire yures

Qui font imprimer leur sotz liures

Pour acquerir bruyt d'estre ueaulx

A mettre en auant cas nouveaulx.

Car à ce que ie voy. Tu quoque de illis es.

PARADOXOLEROS.

Er toy, desquelz es tu? Qui es tu? De quelles
gens? De quelle nation? De quel estat, & profes-
sion? Es tu Bouvier, ou Bouchier, qui si effrō-
téement mé metz au reng des veaulx?

PASQVIL

Medecin suys ie: tel (pour le moins) que toy. Je
suys Pasquil Medicin Romain, & des vieulx.

PARADOXOLEROS.

Hamonfieur le docteur Pasquil, vrayement le
ne suys esbahy si sotement, lourdement, & des-
raisonnablement tu has de moy iecté dure,
froide, & maledicque sentence. Ains plustost

suys esmerueillé comme tu has peu' aulcune-
ment parler.veu que Pasquil(lequel tu te dis
estre)n'est que vne rude & informe pierre insen-
sible:n'ayant aucun sentimēt esperit ne raison,
mais vne statue,& vng Baboin rommain ridi-
cule ne seruant à aultre chose sinon à porter, &
publier impunement les diffamatoires pla-
cardz des blasonneurs.

PASQUIL.

Mon amy Paradoxoleros.Pierre suys! iē voire
ment.mais non insensiblē,ne sans sens & sans
raison,tel comme tu me descrips. Car tu n'has
memoire de la prophetie,qui ha dict que plus-
tost les pierres plerōt: q̄ la verité soit taifée. Et q̄
dieu de ces pierres peut susciter les filz d'Abraā
Parquoy tu ne te doibz esbahir si i'ay po-
voir,& sauoir de parler.Ignores tu que vne grā
de partie de la vertu naturelle est mise es pier-
res? Ne vois tu que les pierres(qui semblēt estre
trefroides geētent,& elident (mesmement
quād elles sont frappées)vng feu trefvif,en elles
par auant latent? duquel peut estre allumé vng
grand embrasement? Je suys pierre certaine-
ment.Mais fais tu quelle pierre? Je suys pierre
d'offension: contre laquelle quiconque a heur-
te,& empainct,il se blesse,quasse,& froisse.ainsi
que tu has faict(O Paradoxoleros)empaignāt,
& te aheurtant contre moy Pasquil,nō Baboin

(comme tu dis) mais simulachre de libere
& franche verité, & ce non seulement con-
tre moy. Mais aussi contre plusieurs autres tel
les fermes pierres, solides colonnes du temple
A Esculapien. pour lesquelz, plus que pour
moy i'ay entrepris la contrepicque de ton
mal picquant vinaigre: Car contre iceulx toy
reneótrant, & frappant, has rompu, & mis par
pieces ta fraile foiblesse, en te blessant grande-
ment toy mesme, avec ton beau liure **P A R A -**
D O X E de la faculté du vinaigre.

P A R A D O X O L E R O S.

Qu'en veulx tu doncque dire, de mon Para-
doxe? n'est ce pas vng œuure merueilleux, &
remply de grand fauoir?

P A S Q V I L.

C'est vinaigre mal propre à condire bonnes
herbes.

P A R A D O X O L E R O S.

Pourquoy cela?

P A S Q V I L.

Pource quil n'ya ne sel ne huyle. c'est à dire ne
grace, ne sapience,

P A R A D O X O L E R O S.

Ha que dis tu?

P A S Q V I L.

Ce que est vray.

P A R A D O X O L E R O S.

Vray?

PASQVIL

Tresvray.

PARADOXOLEROS.

Tu n'y faurois que reprendre.

PASQVIL

Veulx tu doncq' que i'en face l'essay?

PARADOXOLEROS.

Oy da, hardiment. Et si ie ne te?

PASQVIL

Or ayes les oreilles autant patientes à escouter
te contredire, comme tu has la langue prom-
pte à maldire.

Car qui dict ce qu'il ne deburoit

Doibt ouyr ce qu'il ne voudroit.

PARADOXOLEROS.

Cóment tu me poings? Ie cognois maintenãt
que tu en parles par affectiõ, & plus par hayne,
ou enuie de mon aduancement, & craincte de
ta degradation par moy surcroissant en bruyt:
que par amour de vraye verite.

PASQVIL.

Ie proteste q' tout ce que ie contrediray à ton
œuure, ne sera par aucune mauuaise affection
enuers ta personne. mais pour deux causes seul-
lemẽt bien raisonnables. La premiere affin q' ne
moy, ne les aultres Mediciens (mesme de la pro-
vince Lyonnoise) ne soyons mesurez à ton
pied, preiudiciez par ton default, & estimez
estre (pour ne contredire) en telle erreur d'opi-

nion, & peruerfité de Iugement, comme toy.
Car Qui se taift: semble consentir. L'autre af-
fin que le Chirurgien, ou aultre quelcôque qui
lira le tien tracté Intitule. Paradoxe: ne soit at-
traict, & deceu par faulſe doctrine. Pour ces
deux cauſes, ie te vueil tes faultes remonſtrer.
& à toy, & aulx lecteurs. A toy, Iouxtc le con-
ſeil du ſage Hebrieu, diſant. Reſpondz au fol,
ſelon ſa folie: affin qu'il ne ſe penſe eſtre ſage.
Aulx lecteurs: Iouxtc la loy des douze tables,
qui ordonnent monſtrer la droicte voye aulx
defaillâs, & les ramener de la faulſe, a la droicte.

PARADOXOLEROS.

Et quelles faultes me porrois tu remonſtrer?
toy Statue d'homme. & non homme?

PASQVIL.

Quelles (O bon Dieu) Or pour commencer
l'anatomie du corps de ton tracté: Nous pré-
drons premieremēt le chef: c'eſt a dire le tiltre
de l'œuure, qui eſt tel.

PARADOXE DE LA FACVLTE DV
Vinaigre, contre les eſcrits des Modernes, ou plu-
ſieurs choſes ſont demonſtrées nou eſlongnées de la
verité. Ce trefambitieux tiltre en parole eſt
impropremal conuenant a la choſe, & en la
ſentence eſt faulx. Car premierement ce mot
Paradoxe (lequel mot en l'appentis de la pro-
priété du vinaigre, tu trauailles à declarer ſans

definition, ne etymologie en te tormentant, par
diuers exemples barbares, impertinens, & au-
tant a propos, que Magnificat a matines, & si tu
n'en puys bonnement sortir a ton honneur)
Paradoxe (dy le) est chose oultre l'opinion cō-
mune. & par ce admirable, & tresexcellente. Et
en tel sens propre le ha vsuré Ciceron orateur
Rufinian Rheteur, & Alciat iuriconsult en
leurs vrayz Paradoxes, Or en telle signifiance
ce mot Paradoxe, ne conuient a ton œuure. Car
il n'est point admirable, ne tresexcellent, & si
n'est contre opinion commune: ains plustost,
est mesme opinion, ou opinia stie tienne, non
commune, mais a toy propre & particuliere.
Car s'il est contre opinion commune: Il est
doncq contraire a l'opinion, & sentence com-
mune, & vniuersele de Hippocras, & Galen'.
desquelz les opinions suyuent tous les moder-
nes mediciens (contre lesquelz tu veulx sembler
Paradoxer, & contr'opiner) Parquoy si ton Pa-
radoxe est contre les communes opinions Hip-
pocratiques, & Galenicques. Ia tu te condam-
nes toy mesme, & te declares scismaticque en
medicine, derogant a l'autorité approuée & cō-
fermée des anciens Princes en l'art, & premiers
maistres. En cela te demonstrent bien estre suc-
cesseur, & Imitateur de Crinas, & Charmis, tes
ancestres, Massiliens comme toy. qui par nou-

uelle arrogance condamnoient tous les anciens
medicins. Or si tu respõdz que ton Tracté n'est
point escript contre les opiniõs d'iceulx, donc
que ce n'est point Paradoxe, & par consequẽt
le tiltre est impropre.

PARADOXOLEROS.

Et que saiz tu si ie l'entendz autrement? Car
Paradoxe est vng nom Grec de diuerse signi-
fiance.

PASQVIL.

Ha, vrayement (Iaçoit que ie croy, que le grec
ne te cognoit) Si touteffois tu prens δόξα pour
gloire, & non pour opinion: tellement que Pa-
radoxe signifie oultre passe de gloire. Ainsi cer-
tes ie ne nie pas que Paradoxe ne soit tiltre con-
uenable à ton œuure.

PARADOXOLEROS.

Tu es maling cauillateur, & quāt a mon tiltre:
ie ne l'entens pas ainsi.

PASQVIL

Et comment doncq? Nullement? D'auantage
l'inscription est faulse. car cōme les trōpeurs
hostelliers: qui font escrire au tableau de leur
enseigne. Ceans ha bon logis, bon vin, bõ foin.
Et neantmoins la maison est vêteuse, pluueuse
fumeuse, ruyneuse, ou pestilente, le vin tourné,
aigre, esuenté, le foin, autumnal, & de gros reui-
ure, Iceulx sont criminelz de faulseté, selon le
respon du prudent Iurisconsult Scauola, &

selon la resoluë disputation de Antipater Sido-
nien, & Diogenes Babylonien. Ainsi es tu coul-
pable de faulseté: qui en la premiere inscription
prometz de traicter choses non esloignées de
verité. Tout au contraire par le discours du li-
ure, tu tractes plusieurs erreurs, & faulsetez nō
seulement esloignées de verité: mais diametra-
lement repugnantes à icelle, comme à la pour-
suycte de ceste disputation clairement ie te de-
monstreray.

PARADOXOLEROS.

Ha mon amy Pasquil: ne fais tu pas que com-
me les magnificques portaulx inuitent à entrer
es logis, en derriere tous ruynieux: Ainsi les
beaux, & magnificques tiltres des liures indui-
sent à lire tout l'œuvre mal ouuré, & icelluy a-
chepter, & faire bien, & plus cher vendre aux
libraires.

PASQVIL.

Cela est courrater les escriptures, & non fidele-
ment escripre, Parquoy tu ne te puy excuser
du crime de faulx: par la loy Cornelianne.

PARADOXOLEROS.

Telle chose, par le droict costumier n'est e-
stimée deshonneste, cōme le met Tulle, au tiers
liure des Offices.

PASQVIL.

Or bien venons du tiltre, à L'epistre, Au com-
mencemēt d'une epistre quasi Latine, malpro

prement premise au traicté François. Car c'est disparilité, vice defédu par tous rheteurs grecz latins, & françois, par laquelle epistre tu adresses tó Paradoxe à vng medecin du Roy, ou tu dis q les Grecz appellét tous les ars & disciplines *μαθηματικά*. mathemata. Pource que elles enseignent la chose par tresseure, & certaine demonstration.

PARADOXOLEROS.

N'est pas cela bonne definition: pour vne parenthese epistolaire?

PASQVIL

Non certes. Car elle ne conuient au definy ne tout, ne seul, ne tousiours.

PARADOXOLEROS.

Pourquoy non?

PASQVIL.

Pource que plusieurs ars, & disciplines se traictent sans demonstration, ains seulement par raison, vsage ou autorité. Comme les trois Sermocinales, & les nobles sciences, Philosophie, Medicine, Iurisprudence, & Theologie. qui sont en ratiocination. experience, vraysemblance, raison, & foy, sans demonstration. Parquoy ceste definition ne conuient à tout art, & discipline, comme tu entroposes.

PARADOXOLEROS.

Qu'estce, que art? Qu'est ce que discipline?

PASQUIL.

Je le demanderoie à toy, si ie vouloie en estre confuz, & ne fauoir que c'est Art, Science, Discipline, Doctrine. Saches toutesfois, que les disciplines Mathematicques, demonstrent les choses qu'elles tractent avec certaines demonstrations vrayes, & necessaires. Et icelles sont quatre seulement. Lesquelles Aristote en ses posterieures dict estre colloquées au premier degre de certitude. Or les aultres sciences, & disciplines n'hont pas telle certitude demonstratiue à enseigner les choses qu'elles tractent: parce qu'elles ne sont fondées en demonstration euidēte ou par le sens, ou par les premiers vrays & necessaires, cōme les quatre Mathematicques.

PARADOXOLEROS.

Je ne say que ru dis.

PASQUIL.

Je t'en croy certes. Car aussi ne fais tu en toute ceste epistre dedicatoire, mal latine, incōsequēte, bigarrée, ou plustost rapetacée de pieces disconuenantes, tellement que (comme dict Horace) ne la teste, ne le pied ne respond à mesme forme, le ometz les Improprietez, & solœcismes d'ond les petitz grammairiens se peuuent mocquer à bon droict, comme *cogitationem obseruata*. L'inuention des hommes estre le fruyct de tous arts, ce que est *ὑσεργον πρὸς ἑργον*.

de l'accroissement des choses amplifier retro-
gradement à l'atticisme des parolles, *Idioma pe-
regrinam, plæbea nō somnolentas, & commentitias.
multa in literis profecisse. sapere tunicam, tristem in-
scitiam, tristem quartanam, nec iure, nec inique, dolo-
rem lenirem, potius quàm perderem, occupari febrī,
ne non, pro simplici negatione, sanos dies. Vnde, (pro
quare) rem suam tutari, (pro sententia) libelli vale-
tudinem. Et telles aultres elegances dieu scet
quelles.*

PARADOXOLEROS.
Ce ne sont les fautes de l'auteur, mais de
l'imprimeur.

PASQVIL.
C'est cela.
Ainsi l'imprimeur es malfaiet.
Porte des asnes tout le faix.

PARADOXOLEROS.
Va vicil follastre. T'amules tu à cela? ne fais tu
pas ce que dient messieurs les Legistes? *Nō est
curandum de verbibus: modò habeamus rei
intentio.*

PASQVIL.
Et pource ie laisse la reprehension de la parol-
le tant en Latin, que en François, impropre, in-
congrue, sans suycte ne ordre, cheuillée & bi-
garrée à reprédre au vulgaire populaire: lequel
sottemēt tu preferes a tout aultre ordre des hō-
mes, en raison, & doctrine, & victoire d'ignorā

ce te disant auoir d'icelluy populaire appris
les choses meilleures. O disciple digne de tel pre
cepteur, & croyable d'auoir esté enseigné par
artisans, charretiers, & portefaix, plustost que
par excellens docteurs, & gens de hault estat.
desquelz quant ores tu aurois esté appris, en
core te monstrerois tu tresingrat, preferant à
iceulx, le populaire, duquel n'est rien plus idiot
ne plus beste. Et neantmoins d'icelluy tu reco
gnois, avec ioye, les meilleurs profictz.

PARADOXOLEROS.

Aussi en sont ilz venuz.

PASQVIL.

Oy parauenture profictz pecuniaires, que tu
has faictz en abusant de la simple bestise d'icel
luy, Mais c'est mal conclu en friseromoru: pro
poser antecedent de raison, doctrine, & iuge
ment au precepteur, & inferer conclusion de
profict de bourse au disciple.

PARADOXOLEROS.

Si ce n'est bien conclu en friseromorum: c'est
bonne consequence en celarent. Et d'aduantage
soubz le nom de populaire: ie vueil cōpren
dre les grandz homes, & nobles, & sages. Ioux
te la denntion Iustiniane de *Populus. es Insti
tutes. De Iure naturali gentium & civili. Lex est.*

PASQVIL.

Vela bonne eschappatoire. Or bien c'est assez
titulé, & epistolé. venons au principal poinct

qui est la faculté du vinaigre.

Après vne longue Battologie des langues vulgaires, impertinente à ceste matiere, deuât que entrer en propos: ne dis tu pas que le Medecin & le vulgaire (en imitant le medecin) prend le vinaigre pour prompt remede cōtre syncope?

PARADOXOLEROS.

N'est Il pas vray? l'en demande à mon auteur, & docteur. le populaire.

PASQVIL.

Et ie m'en rapporte aux medecins doctes, & exercitez: si pour soubdain remede à la syncope, ilz ne prennent pas plustost le vin, préparé en diuerfes manieres selon la diuersité des causes, desquelles peut proceder ladicte syncope, que le vinaigre? Et ce par le cōseil de Galen au liure. xij. chap. iij. de la Therapeuticque.

PARADOXOLEROS.

Mais qu'en veult il dire ce gentil galand?

PASQVIL.

Le vin (dict il) lequel de sa nature est chault, & facilement se cuyct, & aussi se distribue par le corps: conuient à tous ceulx qui sont attainctz de syncope. Auquel lieu, Galen ne parle aucunement du vinaigre. Lequel mesme auteur sur la seconde section des Aphorismes, nombre xvij. dict ainsi Le Vin est celluy qui plustost nourrit, & plus abondamment quenulle autre chose. Or comme ainsi soit qu'en syncope, en
ayant

ayant regard plus à l'accident que à la cause, en
core que peussions augmenter la cause, soit be
soing de reparation des espritz, & multiplica
tion d'iceulx, le vin le fera mieulx, que le vinaï
gre, & que nulle aultre chose, soit en le beuuât,
ou en frottât les poulx, ou en odorant l'odeur
du vin, especialement quand le vin est bon il
côforte les esperitz & aussi les vertus du corps
fondées en esperitz.

PARADOXOLEROS.

Et le vinaigre n'est ce pas vin, & pource ayant
les facultez que tu attribues au vin?

PASQVIL.

Le vin aigre est vin, mais aigre. & n'est nō plus
le vinaigre vin. que l'homme mort, hōme. Dōd
aussi il ne nourrit pas le corps, pource qu'il
ne se peut conuertir en sang ny en esperit &
pourtant n'engendre ne multiplie les esperitz.

PARADOXOLEROS.

Vouldrois tu doncq' nyer que le vinaigre ne
fust conuenant remede à la syncope?

PASQVIL.

Oy ie le nyc en vniuersel. Vray est que il pour
roit conuenir à quelque particuliere syncope,
prins regard à la cause d'ond elle procede, &
icelluy encore meslé en le beuuât, ou frotât les
poulx, ou en l'odorant. Laquelle particuliere
cause ie ne exposeray maintenant. Car mon in-

tétion n'est de icy traicter la curation de syncope pour ne extrauaguer cōme toy. Mais declarer ton paradoxe & paraloge cacquet de la faculté du vinaigre, estre en plusieurs choses esloigné, de verité, escript trop legierement, & sans iugement.

PARADOXOLEROS

Et quoy plus?

PASQVIL.

Au mesme lieu tu dis que le vinaigre est vtile pour preseruer l'homme de peste, pource qu'il corrobore les vertus, singulieremēt les vitales, lesq̃lles corroborées singulieremēt resistēt au venin. & ce, nō pour resserer les pores, cōme tu dis.

PARADOXOLEROS.

Cela, est ce erreur?

PASQVIL.

notez Manifeste. Car le vinaigre froid, & sec de sa nature, & de soy par telles qualités cōtraire aux esperitz, qui sont chaulx & humides, ne corrobore point iceulx esperitz: ne par consequēt les vertus fondées es esperitz.

PARADOXOLEROS.

Pourquoy non? Et quelle choses myeux les corroborent.

PASQVIL.

Choses chauldes, & humides, & de subtile substance: mesme quād elles sont de bone odeur, comme le bon vin odorant. & telles aultres.

PARADOXOLEROS.

Vouldrois tu doncq du tout nyer que le vinaigre ne corroborast les espritz, & vertus, & ne fust bon contre la peste.

PASQVIL.

Non en tout, & par tout. Car il est veritable q̄ le vinaigre pourroit corroborer accidentalement qlqun ayāt discrasie de coeur, chaulde & humide hors de nature, reduysāt icelluy en sa température naturelle. Semblablement qui auroit le coeur froid & sec temperément de sa nature sans excès, en le conseruant en sa température naturelle. Le vinaigre aussi accidentalement garde q̄ les humidités près du coeur, prestes a se corrompre facilement, ne se corrompēt: & ce, ou l'odorant, ou en frottant les poulx, ou en v-sant mediocrement es viandes ordinaires.

Le vinaigre de rechef, faiēt accidentalement vnir les espritz, & les vertus, à cause de sa frigidi-té dominante, et siccité lesquelz espritz: vniz font plus fors que parauāt. Car la nature du vin ^{notez} aigre est, après auoir penetré ou on l'applic-^{yez} que, restraindre, & reserrer les pores, (comme plus à plain cy après nous prouuerons, en declarant sa nature) & ce à cause de sa qualité seiche & froide en luy dominante. Et pource garde que l'air corrópu ne penetre dedās le corps.

PARADOXOLEROS.

Que veulx tu doncq dire, Cela ne faict il pas pour moy, & contre toy?

PASQVIL.

Il est bien vray que en ces trois manieres dernieres, le vinaigre est vtile contre la peste, & peut bien preleruer l'homme de tel venin. Mais cela se faict accidentalement, non substãtialement.

PARADOXOLEROS.

Je ne me soucie, ou occidentalement, ou orientalement, mais quil soit ainsi que ie dyz.

PASQVIL.

D'aduẽtaige à toy qui te fais medecin, est faul te bien plus enorme prẽdre vne maladie pour aultre, en faisant de beaulx comptes.

PARADOXOLEROS.

Comme quoy?

PASQVIL.

Comme dilant auoir veu vne femme sans interieur medicament, avec ius d'herbes seullemẽt guerir la tache de l'oeil dicte en latin *ungula*, en grec *πτερυγιον*.

PARADOXOLEROS.

N'est ce pas proprement rendu le latin en grec & monstré en sauoir quelque chose.

PASQVIL.

Oy vrayement, ne fust que l'orthographe du nom grec mal obseruée es lettres latines, des couure lignorãce du tourneur grecule affecté.

PARADOXOLEROS.

Net'ay ie pas protesté que ce sont fautes de
l'imprimeur *Santo de dio*.

PASQVIL.

Charge, charge le mulet. Mais dire que la ta-
che de L'oeil, est *ungula* ou *pterygion* ce est con-
fusion, & non verité.

PARADOXOLEROS.

Confusion?

PASQVIL.

Oy confusion, confondant maladies diuerfes
en vne mesme espee. Car la tache de l'oeil, &
ungula ou *Pterygion* sont maladies bien diffe-
rentes. Et pource les Medecins anciens, tant
Grecz, que Arabes, hôt faict chapitres differés
d'icelles maladies: & aussi la guarison en est
bien differente. Et iasoit que mon intention ne
soit pas icy de parler de la difference des mala-
dies ne de la guarison d'icelles. Je suis cōtrainct
toutesfois de ce faire pour te monstrier ta lour-
de faulte.

La tache de l'oeil est maladie de la *cornea*, la-
quelle est sur la pupille de l'oeil, Et quād icelle
tache est subtile: des medecins est appelle *Ne-
bula*, quand elle est grosse, *Albugo*. Et souuen-
tesfois icelle tache est vne cicatrice, laquelle
demeure apres la guerison des vlcères d'icelle
cornea, qui est deuant la pupille. Quelque fois
aussi decourt vn humeur pituiteux, subtil, le

quel passe toutes les tunicques des yeulx, ius-
que à la tunicque *cornea*. Aulcunesfois icelluy
humeur s'arreste à la superficie de dehors *cor-*
nea. Aultresfois pource que icelluy humeur est
plus gros il demeure à la superficie concaue
de la *cornea*: Quand la tache de l'oeil est vne
cicatrice, il est impossible de la guerir, specia-
lemēt si elle passe iusque à la superficie cōcaue
de la *cornea*: icelle tache se peut guerir és enfans
si elle est exterieure, & superficielle, mais si elle
est profonde, ne se peut guerir: mais biē se peut
decorer. Et quand icelle tache prouient d'hu-
meur pituiteux, elle peut estre guerie facilēmēt
après que le corps soit euacué des humeurs su-
perfluz, avec medicamēs absterfisz, & diapho-
reticz, ayans quelque astrictiō: de laquelle ver-
tu sont plusieurs pouldres, eaux distillées, ius
d'herbes: comme ius de pauot rouge de la cen-
taurée mineur, & aultres de semblable efficace.
Voyla l'exposition de la tache de l'oeil selō ses
especes, Mais *ungula* ou *pterygion* (puys que
tant es affecté en ton Grec) est vne superfluité
semblable à vng nerf: laquelle viēt sur la *cornea*,
cōmenceant son origine le plus souuent sur le
lacrymal grād, & se cstedāt sur la dictē *cornea*,
Laquelle superfluité quelque fois croist tant,
qu'elle couure toute la pupille. Galen au pre-
mier liure de la differēce des maladies dict que

ungula est maladie en nombre adiousté, & surabondant, de telle sorte, que est le sixiesme doigt en celuy qui en ha plus de cinq. De laquelle *ungula*, les anciens medecins mettent tousiours quelque difference, tant à la couleur, blanche, rouge, rousse, liuide, ou plombée: que à l'attouchement, estant molle, dure, adherente separée, de fondement grand, ou petit, comme aussi au tēps, l'une auenir, l'autre vielle: lesquelles differences tu trouueras (si tu les veulx & fais chercher) en Paul Eginet. Corneil celse, & Auicēne, *Galen Aetio Vngula* cōmencāt à venir est molle au tact, blanche en couleur, & lors se peut guerir avec medicamens abstersifz, lesquels doibuent estre plus fortz qu'en la tache de l'oeil appellée *Albugo*. Quand elle est dure, & adherēte ne la fault toucher, ne essayer de la guerir. Quand elle est molle, & son fondement est extraict, & aussi quelle ne soit pas adherente, le plus souuent elle est guerie avec operation manuelle, & peu souuent avec medicamens locaux se guerit. Finalement si tu has leu Corneil celse. au 7. liure, Paul Eginete au 6. liure *Aetius* au 7. liure: Auicēne Fen. 3. *Gallen. 4. de compositione mendicamentorū secundum locos*, tu trouueras differēs chapitres de la tache de l'oeil appellée *Albugo λεύκωμα*, & de

ὑγίεια, ὡς ἐγὼ γινώσκω. Parquoy mō amy recognois
& confesse, que tu prens vne maladie, pour
autre.

PARADOXOLEROS.

Rien, riē, ce n'est pas ma costume, Reconnoi-
sances obligent, & confessions sont preiudicia-
les, ie nen vſe point. Mais ie nomme generale-
ment tout vice des yeulx troublāt & diformāt
les yeulx & la veue, tache de l'oeil. Or le pren
comme tu voudras. Mais toutesfois i'ay veu
l'experience que ie t'ay dicte.

PASQVIL.

Il nē fault pas plourer: par aduēture qu'il n'est
pas vray: Ce sont de beaux cōptes non parado-
xes, mais parergues, & hors de l'argument. les
quelz la plus grand part nous fauons estre fabu-
leux ou hyperbolicz, & pource (dict Socrates
des escriptz de Heraclit) estimons tous les aul-
tres estre telz.

PARADOXOLEROS.

Si l'ay ie veu, de mes yeulx.

PASQVIL.

Ce n'est pas de merueille. car possible est que
icelluy corps parauant estoit euacué des hu-
meurs superfluz. Car autrement icelle femme
en applicquant tel remede, sans premierement
auoir euacué les mauuais humeurs, luy heust
faict plus de dommaige, que de profit.

PARADOXOLEROS.

Je dy bien d'aduantage que auant l'application
faicte par ladicte femme, plusieurs Medicins
n'y auoient sceu que faire.

PASQVIL.

C'estoient doncq' Medicins: ou pluſtoſt Pſeu-
diatres discordans & quereleux en cōſultatiō,
cōme toy, qui en tout le Broillis de ton Parado-
xe, te demōſtres eſtre naturellemēt meſdifant,
quereleux & langagier, trop plus que docte.

PARADOXOLEROS.

Il n'eſt pas vray.

PASQVIL.

Je le monſtrera y vray. Car au lieu de traicter la
faculté du vinaigre par bōne methode, & ſuicte
de propos ordōnez, tu faultes du coq à laſne,
nō entrelaceāt, mais entrebrisant pluſieurs di-
uers propos, maintenāt maledicques, puis theo-
logicz, en apres legiſtes, puis aulcunemēt philo-
ſophicz, & puis fabuleux ou hſtoricz, tellemēt
quil ſemble que tout ce peu q̄ tu has leu, le ayes
voulu enfarcir en ceſte cote mal taillée. Et
apres auoir cōſommé pluſieurs fueilletz à tour-
noier ainſi à l'entour de la porte de l'argument
ſans y entrer, tu te eſmerueilles toy meſme (cō-
me vng paon de ſa queue) de tō hault parler, &
de ta belle digreſſion (ſi dieu plaiet): cōme ſi
vng viateur ſe plaiſoit à ſoy meſme d'auoir errē
par mons & vaulx, ca & la, par landes & bois,

& tous chemins desuoiez, en laissant au lieu la
droicte voye, & par ce n'estre entré ou estoit
le but de son pelerinage.

PARADOXOLEROS.

Variété delecte nature en toutes choses, mesme
mentés escriptz.

PASQVIL.

Il est bien vray si elle est entregectée, & en-
tresmée sans rompre le fil de l'oraison.

PARADOXOLEROS.

Ne faiet il pas beau veoir vng habillemēt en-
richy de belles brodeures?

PASQVIL.

Oy vrayement, mais que la forme de l'habille-
ment y demeure inuiolée. Mais au contraire
faiet il pas laid veoir vne mâte de coquin, sans
forme de vesture, repetacée de toutes meschan-
tes pieces de diuerses couleurs, amassées par les
rues, es esquouilles des Bobelineurs.

PARADOXOLEROS.

Veulx tu dire que ma digression soit telle.

PASQVIL.

Nó la digressiō seullemēt, mais tout l'oeuure,
duquel les diuers propos non seulement sont
mal conuenans, & dissemblables, mais aussi cō-
traires les vngz aux aultres.

PARADOXOLEROS.

Je nye biē fort cela. Car i'ay aprins mon caton.
Sperne repugnando tibi tu contrarius esse.

PASQVIL.

Tu l'has bien appris:mais mal retenu.

PARADOXOLEROS.

Verbi gratia?

PASQVIL.

Verbi gratia? Comme en disant que la contro-
uerse du vinaigre estoit entre deux chirurgiës,
desq̃lz l'vng & l'autre soubstenoit & prouuoit
son dire par raison, & autorité:& puy a-
prés en la poursuyte du discours,dict l'vng
d'iceulx, aueugle de raison auoir affermé le vin
aigre astringent.

Item dire par les modernes auoir esté, trouuez
remedes aux maladies incogneues, ce q̃ est nō
seulement contradictoire, mais impossible.
Car cognoistre la maladie, est principe du
remede.

PARADOXOLEROS.

I'entens incogneues par auant:par ampliation
à quatre temps.

PASQVIL.

C'est bien sophisticqué. *Quod fuit, vel est, e v
erit, vel esse potuit.*

Item dire Galen irrefragable, & en aultre
lieu quil n'est necessaire soy arrester à son
autorité.

Item dire que au 19. 20. 21. 22. 23. chapitres
des simples. Galen ne se oblie d'affirmer que

le vinaigre soit astringent & incontinent apres
qu'il n'en heut iamais opinion Itē. soy soubz-
stenir en vng lieu de l'autorité de *Aetius* & en
vng aultre dire que à vng besoing on le peut
nyer, Itē dire que les Arabes ont oppugné la
doctrine des Grecz, & *Auicenne* prince entre
les Arabes se proteste interprete du grec *Galē*.
Item se dire estre iuge entre les contendans,
& puis se faire partie, vela de tes belles concor-
dances d'escripture.

PARADOXOLEROS.

Ay ie dict tout cela? Ce ha doncq' este sans y
penfer:

PAS QVIL.

D'aduantage du petit caton (duquel tu dis tant
bien sauoir) tu has oblié ce verset.

Turpe est doctori cum culpa redarguit ipsum.

Car (apres *Galen*) tu vitupere les logiatres c'est
a dire medecins parolliers, qui se arrestent es
noms, entre lesquelz tu me semble le plus no-
minal, disant de fois à aultre (comme si tu ense-
gnois de petitiz enfans) vne telle chose en latin
se nomme ainsi, & en grec ainsi, & ce non vne-
fois, ou deux, mais tant souuent que le lecteur
s'en doibt fascher, ie croy que c'est pour em-
plir papier.

PARADOXOLEROS.

Ce n'est pas cela. Mais pour plus facile intelli-

gence en la fynonymie des langues.

PASQVIL.

Mais plustoft par affectée ambition de montrer que tu has gousté du grec, dond tu ne cognois aulcunement la faueur.

PARADOXOLEROS.

Qui moy?

PASQVIL.

Il en appert. Quand tu ne sces pas mesmemēt rendre lettre latine respondāte à la lettre grecque. car καταγενι en grec tu escripz catageni en lettres latines, tournant improprement vng grec en vng latin, ignorāt que κα est vng ἐ λόγ. en suyuant l'asnerie de ceulx qui fouloient dire *paraclitum*, pour *paracletum*. tresbiē redarguez par François Philelphe. Or regarde doncq' que tu n'es pas seulement elementaire en grec, duquel tu fais tant de mines, pour la quelle consciēce de ton infirmité ie croy que tu te rues ainsi sur les greciseurs. Mais (comme dit le prouerbe) les chiens abayent à ceulz qu'ilz ne cognoissent point.

PARADOXOLEROS.

Tout cela ne sont que parolles.

PASQVIL.

Ce sont parolles ioinctes aulx choses mais venons a la principale, qui est de la faculté du vinaigre, & sans affection ny passion, considerons desquelz est la sentēce plus veritable, ou la

Les aussi
vz qui
aproune
le vinaigre
estre
stringens
tienne, ou celle de Messieurs Martin Acacia,
Tagault, Holier, sauans docteurs de Paris en
medecine, vido de vidis docteur, Medecin, Ita-
liem, Fuchsius docteur Medecin, Allemant,
tous sauans, & bien exercitez en l'art de
medecine, Tous lesquelz en leurs escriptz
fuyuans Galen, lumiere des Medecins, Mettent
le vinaigre auoir astringtion.

PARADOXOLEROS.

Et i'ay dict, & dy le contraire.

PASQVIL.

Or examinons lequel dict le plus vray. Et
premierement avant que de combattre par
autorités, affin que nous ostions toutes equi-
uocations. Quand nous demandons si le vi-
naigre est astringent: nous n'entédons pas qu'il
ayt astringtion vehemente comme les Gales,
Sumac, *Atramentum futorium*: Mais nous enté-
dons, si le vinaigre ha aulcune astringtió, encore
qu'il ayt aultres facultés contraires qui domi-
nent en luy. Car à la mesme maniere que vng
medicament peut estre froid, chault, humi-
de, sec en premier, second, tiers, & quart degré:
aux mesmes degrez vng simple pourra estre
astringent. Laquelle chose preluppósée, enten-
due, tu seras batu des mesmes bastós desquelz
has voulu frapper si grand nombre de gens
doctes.

PARADOXOLEROS.

Ha, tu fais du mauuais, & menaces de battre,
pource q̃ tu portes vn bastõ: scays tu quoy, d'e
stre batu ie n'en ay cur: entès le puerbe italiẽ.

Dy ce que voudras de la bouche:

Mais de la main point ne me touche.

PASQVIL.

Aussi ne vueil ie vser finon de la bouche, & du
premier ciceronian genre de concertation,
qui est par raisonnable parolle: duquel ie te at-
taindray plus viuemẽt au coeur, & au cerueau,
que ie ne pourroie, ne voudroie faire de mõ
baston de main.

PARADOXOLEROS.

Ie te rabatray bien tes coups.

PASQVIL.

Or le voyons.

En premier lieu, Dioscorides (auteur que tu ne
puis, ne doibs reprouuer) au liure 5. chapitre 11.
dict le vinaigre estre astringent.

PARADOXOLEROS.

Hau, ne scays tu pas cõme i'ay rebatu ce clou?
en reiectãt l'autoritẽ de Dioscorides, quãt à la fa-
cultẽ des simples, aultrement prouuable en la
description?

PASQVIL.

Mais qui t'ha appris à ainsi partir Dioscori-
des, & le tailler en deux pieces par vne bonne,
l'autre mauuaise.

PARADOXOLEROS.

Qui? c'est Galen qui dict ainsi. Le me deporté de parler de la figure des herbes, pource q̄ ceste matiere ha este traictée tresamplemēt par Dioscorides, auquel lieu le louāt de la description, taiblement il reiecte la faculté, laq̄lle (s'il l'heust approuuée) il ne heust pāsée soubz silence. Par quoy quant à la faculté des simples, l'autorité de Dioscorides n'est à receuoir.

PASQVIL.

Qui t'ha appris à si mal syllogiser que d'une affirmatiue, cōclurrevne negative en choses nō opposites? Sēfuyt il: Aristote est approuué en methode, dōcq il n'est pas propre en parolle, Il est Philosophe, dōcq' il n'est pas Rheteur. Il est moral, ergo il n'est pas naturel, Platō est diuin Philosophe, dōcq' il n'est pas eloquēt orateur. Ainsi Dioscorides est approuué par Galē en la description des simples, parquoy il n'est pas receuable en la faculté. O Dieu quelles cōsequen ces de crottes de chieure, que les rustiques ne feroiēt pas. Et ne cōclurroiēt ainsi, Tyuain est bon au labourage: Parquoy il ne vault rien au pasturage, Alizon est bōne bergiere: donc elle n'est pas bonne mesnagiere. Bayard est bon au harnois, parquoy il est mauuais cheual de selle. Brief ton argumēt ne vault rien, & est inconse- quent fust ce deuant Petrus hispanus, Maioris, Dangeſt, Mandeston, ou Crab.

Parado-

PARADOXOLEROS.

Comme doncq' me prouueras tu que Dioscorides soit docte, & receuable en la faculté des simples?

PASQVIL.

Il se peut prouuer par cela, que Galen fuyt Dioscoride, & ne luy cōtredit, & mesmement en parlant de la faculté du Vinaigre: car toutes les facultés que Dioscorides, attribue au vinaigre, Galé les appreuue. Mais mō amy Paradoxeur, ie te voy bien desia rougir de honte, de nyer Dioscorides, pourcerendz toy à sa mercy.

PARADOXOLEROS.

Penſes tu qu'il faille entendre Dioscorides littéralement? Nenny non, il le faut prédre en autre ſens.

PASQVIL.

Quel ſens ie te pry? tropologic, allegoric, moral, anagogic? eſt il Theologié myſtic, ou Poete mythologic: pour y chercher autre ſens q̄ literal?

PARADOXOLEROS.

Literal, mais bien autrement que tu ne le prés.

PASQVIL.

Comment doncq'?

PARADOXOLEROS.

Quād Dioscorides dict le vinaigre eſtre astringent: il ſe doibt entendre (comme i'ay eſcript) vniuerſellement, ſans particulariſer.

PASQVIL.

Bon, bon. Vrayemēt ſi celluy eſt le ſens de Dio-

C

scorides. Il faiet du tout contre ton opinion.
Car si Dioscorides entēd (commen tu dis) que
le vinaigre vniuersellement soit astringent, Se-
lon ton tel sens tout vinaigre sera astringent
tant blanc, que claret, gros, que subtil. Car tous
sont d'ung genre, ou espee, & tous hont astri-
ction selon plus ou moins: ce que ne varie en
rien l'espee. Mais pour t'ayder, (affin que non
du tout abbatu tu puisses suffire aulx coups
suyuans.) le te releueray d'inaduertence, disant
que tu pensois dire le contraire, cest à sauoir q̃
Dioscorides ha parlé particulierement, & non
vniuersellement: ce que donne à entendre ceste
similitude du vin disant. Cōme il se peut trou-
uer quelque vin gros, & astringēt, d'aulture sub-
til, & penetrāt, En pareille sorte se pourra trou-
uer quelque vinaigre gros & astringent, d'aul-
tre subtil, & penetrant.

PARADOXOLEROS.

Or prens le cas que ie l'entende ainsi.

PASQVIL.

Rien Rien. Ce sens la est à la verité contre Dio-
scorides. Car quand il dict le vinaigre estre
astringent, il ne parle pas particulierement ne
determinément d'ung vinaigre gros, & secu-
lent, ains entend vniuersellemēt tout vinaigre
auoir astriction selō plus ou moins. En la mes-
me maniere comme quand Dioscorides parle

de la faculté d'ung aultre simple, il en parle en
general (comme dogmatic) & entend que tout
aultre de la mesme espece, (combien que de
diuerse forme, figure, ou circonstance) ayt mes-
me vertu, selon plus ou moins, A quoy Galen
imitateur de Dioscorides, n'ha voulu estre dis-
sonant.

PARADOXOLEROS.

En quel lieu Beau sire le trouues tu?

PASQVIL.

Au 6. liure de catatopous, ou parlât des vlceres
de la bouche, il met vn medicamēt escript par
Andromach, duquel la totale p̄scription ie ne
vueil mettre pour cause de briefueté Réuoyât
au lieu allegué. Galé dōcq examināt ladicte cō-
position ainsi par tel ordre que sont mis tous
les simples, dict notamment que les galles, le
vinaigre, & le sumach sont les plus astringens
& repellissans: & ainsi afferme le vinaigre estre
astringent & repellent, aussi le sumach, & les
galles.

PARADOXOLEROS.

O chose ridicule, dire que le vinaigre astringēt
cōme les galles, & le sumach, qui sont simples
tres astringens.

PASQVIL.

Ie ne dy, & n'entendz que le vinaigre soit astrin-
gent en pareil degré que les galles & le

Sumach. Mais ces trois simples meslez ensemble, astraignent fort, pour cause du vinaigre mesle avec les deux autres vehementz en astringtion: lequel vinaigre pour estre de tenue substance, donne penetration aux autres simples: (especiallemēt le vinaigre blanc) & ce beaucoup plus, q̄ si les deux autres simples estoient seulz, ou meslez avec d'autre liqueur.

PARADOXOLEROS.

O poure homme insensé: ne cognois tu pas que tu te cōtraries à toy mesme: disant q̄ le vinaigre astringt, & puis q̄ il penetre q̄ sont repugnātes facultez, & qui ne peuuēt estre ensemble en vng mesme, par la reigle des dialectitiens?

PASQVIL

Si font bien par diuerses railons & regardz, cōme au vinaigre sont diuerses qualitez mesmemēt contraires, ainsi diuerses facultes voire opposites, iasoit que non ensemble, & à vne fois.

PARADOXOLEROS.

Declare cela plus ouuertement.

PASQVIL.

Vug mesme hōme peut estre pere, & filz: pere au regard de ses enfans, filz au regard de son geniteur encore viuāt. Le diable est bon par bōte de l'essence cōme crée de Dieu q̄ ha faict toutes choses bōnes, & si est mauuais par malice de ses mœurs deprauetz. N'has tu pas leu le ver buco-

lic, *Limus, ut hic durescit, & hac ut cera liquefit.* ^{exemple}
Vno eodemque igni. ou le poete attribue au feu fa- ^{comme}
cultés cōtraires de endurcir & mollifier. Ainsi ^{Le vinaigre}
cōbien q̄ le vinaigre par sa subtile substāce face ^{est astringent}
penetrer, aussi par apres dōne quelqs astrictiō:
laquelle pourra estre au cōmēcemēt du second
degré, & cecy a cause de sa frigidité, & siccité do-
mināte audict vinaigre: lesquelles sont qualités
astringētes. Or la ou il y ha qualité astringēte, il
est necessaire qu'elle astraigne, referme, & refroi-
disse les corps prochains ou elle touche: Or cela
faict le vinaigre: Parquoy il est astringent.

PARADOXOLEROS.

Je pēse moy & ay biē osé affermer, que Ianus
Cornarius s'est monstré Ian cornard en la trās-
latiō de ce lieu, laissant le texte de Galē ainsi
corrumpu, & mendeux par faulte d'inaduert-
tence, comme i'ay dict.

PASQVIL

Vōla bien parlé, par faulte d'inaduertēce. Tu
cuydois dire par faulte d'aduertēce. Car faultē
d'inaduertence est souuerainé diligence, & ob-
seruance. Tu parles comme le Populaire ton
maistre, q̄ dict vng hōme estre en necessité de
maladie ou il n'en ha besoing, ains en est tout
réply, & appelles vng hōme omnipotēt, quād
il est impotent de ses membres.

PARADOXOLEROS.

C 3

Tu cauilles tousiours les parolles.

PASQVIL.

Tu parles tousiours mal. Mais dy moy, Beau-
fire, en quoy ha failly Cornarius sur la transla-
tion de ce lieu de Galen.

PARADOXOLEROS.

En ce que ou Monsieur l'intrepreteur ha mis
vinaigre: Il y falloit mettre alun, & dire ainsi.
Les Galles, le Sumac, & L'alun, sont les plus
astringens, & repellissent fort.

PASQVIL.

Vrayement, nous sommes grandemēt tenuz
à ce nouuel interprete, qui si fidelement nous
restitue Galen en ce lieu.

PARADOXOLEROS.

C'est le debuoir des literez, & accroissement
des sciences, ainsi corriger les erreurs les vngs
des aultres.

PASQVIL.

Oy avec raison mieulx valente. Mais quelles
raisons tant puissantes has tu pour sugiller pre-
mierement vng tant grand homme, tant en la
medicine que es lāgues, toy qui n'has nulle ou
bien petite cognoissance de la lāgue Grecque?
Lequel docteur en traduisant ce passage de Ga-
len ainsi qu'il est en l'exemplaire Grec, ha
suyuy & du tout exprimé en latin ce que Ga-
len ha heu intention de dire en Grec. Com-
ment has tu osé si confidemment muer la le-

ecture ancienne par tant de siecles, & tant de
sauans hommes inuiolablemēt obseruée, & gar
dée en son entier, sans aucune doubte? Quel
le cōiecture prouuable te induyt à si temeraire
ment changer le mot avec la chose, veu que il
n'ya aucune apparence de corruption des let
tres, ne des syllabes tant au Grec cōme au La
tin? Car quelle affinité ou similitude literaire,
syllabicque, ou dictionnaire y ha il entre *σινίγλα*
& *ὄξος*, *alumen* & *acetum*? nulle certe par laquel
le on puisse coniecturer l'ung auoir esté suppo
se pour l'autre. Parquoy est trop temerairemēt
faict à toy changer, & supposer ta faulse, & im
pertinente diuination, pour lātique & vraye
diction encore en redarguant vng homme de
trop plus grāde credence, & plus grand sauoir
que toy, sans aucune comparaison.

PARADOXOLOS.

I'ay vrayemēt escript, & encore vueil soustenir
qu'il y fault alun & non vinaigre: ce q̄ on peut
cognoistre par les parolles subseq̄ntes, car Galē
en parlāt & examināt vng chescū simple selō sa
faculté, d'icele cōposition a la fin de tel examen,
il parle du vinaigre ainsi qu'il sensuyēt cer
tainement de la faculté du vinaigre desia plu
sieurs fois en auons parlé, & auons dict qu'il re
percute, diuise, separe, penetre, & qu'il est de ten
ue substance, & plus quand il est blanc que

d'autre couleur: comme en nostre presentere
cepte, & composition fault qu'il soit. Vela cō-
ment il parle du vinaigre en tel lieu allegué
par melsieurs les faulx interpreteurs. Car si
aucun vinaigre se trouuoit astringent: ce ne se-
roit le blanc, moins que tout aultre. Doncq'
fault conclure que par auant, en parlant des
galles, Sumach, ou bien Rhus, qu'il ne failloit
meller le vinaigre pour dire qu'ilz estoient
bien astringens, & de l'entendre du vinaigre
aussi bien que des galles, & Sumach mais
plustost au lieu du vinaigre mettre l'alun.

PAS QVIL.

Pour quoy cela?

PARADOXOLEROS.

Pource que particulièrement par auant n'ha
point parle de l'alun comme des aultres sim-
ples: Et que du vinaigre il en ha parle à la fin
aultrement, & en aultre opinion, que de l'affir-
mer avec les galles & Rhus estre bien astring-
gent, ioingt qu'il heust plustost mis vinaigre
rouge, ou seculét, que vinaigre blanc.

PASQVIL.

Que Galen n'heust point parlé au par auant
de l'alū: Cela est faulz. Car examināt d'aulters
cōpositiōs, esq̃lles l'alū entroit, il l'auoit desia
examiné. Et pource heust este chose super-
flue de faire repetitiō de la faculté du dict alū.

Attendu aussi que nul entendant le grec, ne peut ignorer l'alun auoir grande astringtion, mesme par la denomination autonomafticque du mot *σύνστιγμα*, lequel par grande excellence, d'astringtion (comme dient les grec) *κατ' ἐσχῆν τοῦ σύνστειν*, signifie alun. D'aduantage, si Galen heust dict (comme tu le veulx restituer) les galles, l'alun, & le sumach estre astringens, & repellens, il se fust contredict à soy mesme. Car l'alun combien qu'il soit vehemētement astringent, touteffois, n'est pas repellēt: Pource qu'il est chauld, & sec, & les repellens de leur nature sont froidz: ainsi que dict Galen *6. lib. de compositione medicamentorum secūdum locos*. Mais que Galles, vinaigre, & Sumach sont vehemētement astringens, & repellissent, il ne se contredict pas, mais dict la verite car chascun de ces trois simples est froid & sec. Parquoy en vain tu te efforces de tirer Galen a gueule torse en ton peruers erreur.

PARADOXOLEROS.

Mais que respondras tu, à ce que dessus iay allegué, que Galen se dict auoir parauant parlé de la faculté du vinaigre, q repercuté, diuise, separe, penetre, & sans mētion faire d'astringtion.

PASQVIL.

C'est pour mōstrer q le dict vinaigre oultre l'utilité qu'il faict meslé avec d'autres medica

mens, pour les faire penetrer, encore il incide,
discute, & repellit: & ce avec astrictiō cōme icel
luy Galen ha dict par auant. Or les repercussifz
lesquelz repercutent avec astrictiō, sont les plus
excellens, là ou tu has failly bien louredemēt, &
par grande ignorance, disant que Galen veult q̃
les medicamēts qui astraignent, & condensent
les pores, & conduictz, & aussi viēnt à lyer, &
retenir la substance & humeur des parties pro-
chaines soient contraires aux medicamens re-
pellans, Laquelle chose est du tout faulse, & toy
mesmes ne sces que tu veulx dire, & n'entendz
aucunement Galen. Car les medicamēts vrayz
repellens font telle operation. Et ce est la defini-
tion du medicament repellant.

Et pourtant que c'est la definition luy doibt
conuenir, & ne luy doibt estre contraire, ainsi
comme il dict.

PARADOXOLEROS.

Cuydes tu que ie ne sache quelz sont les repel-
lens, & que ie n'aye leu Galen aussi biē comme
toy, voire mieulx.

PASQVIL.

Si tu l'auois biē leu au 6. liure Catatopous tu en
heusses parlé plus sagemēt. Car là ou Galē faict
mention de deux sortes de repellans. Les vngz
font froidz seullement: & iceulx condensent les
pores & cōduictz: les aultres froidz secz & astri

gés, lesq̃lz Galé dict qu'ilz repellissent mieulx,
condésent plus les pores, aussi retiēēt plus les
humeurs des parties prochaines. & sont plus
froidz que les premiers. Desquelz aussi ledict
Galé parle au 5. des simples chap. 17. Tu trouue
ras aussi ces deux manieres de repellés, en la me
thode therapeutiq̃ & en plusieurs aultres lieux.

PARADOXOLEROS.

Tout ce que tu has dict ne me scauroit donner
à entēdre que Galen soit en l'opiniō de Diosco
rides, quant à estre le vinaigre astringent.

PASQVIL.

Or si cela ne suffiēt, lis au premier liure des sim
ples chap. 19.

PARADOXOLEROS.

Je say bien que tu veulx dire, ie l'ay bien leu.

PASQVIL.

Mais mal, & malicieusement, car sur icelluy lieu
tu calūnies avec grāde mēfonge, ceulx qui dient
que le vinaigre ha astrictiō, en affermāt impu
dēmēt que en cest endroict Galé ne faiēt aulcu
ne mētion du vinaigre: ce qui est contraire à la
verité. Car en celluy chapitre Galé parle du vin
aigre quand il dict qu'il reprime la fluxion du
sang, non pas comme médicament caustique,
mais de la maniere comme font les medica
mens astringens.

PARADOXOLEROS.

Que say ie si le lieu ha esté bien translaté.

PASQVIL.

Je croy bien que tu n'en fais rien. Mais ie says bien aussi que tu ne le saurois nyer. Car toy mesme en ton oeuure has confessé que là endroict Galen ne se soit oblié d'affirme qu'il soit astringent (côme par auant nous te auous monstré en tes contredictes.

Or d'aduantage veulx tu que ie te coupe la gorge de ton costeau mesme?

PARADOXOLEROS.

Nenny, non. Car ie saignerois. Mais parle seulement.

PASQVIL.

Ne has tu pas escript, que le vinaigre est vtile à retirer la vuule relaschée?

PARADOXOLEROS.

Oy vrayement & le vueil soustenir.

PASQVIL.

Et ie le recoy. Or entens maintenant mon argument. Hipocrates dict que les contraires sont curez par leurs contraires. Or astringtion est contraire a relaxation: le vinaigre doncq curât relaxation de vuule, tient de astringtion.

aprobacion
Le vinaigre est
astringent

PARADOXOLEROS.

La maieur de ton argumēt (qui est le Aphorisme de Hippocrates.) n'est pas vniuerselle, ne tousiours necessaire.

PASQVIL.

Or puis que tu ne veulx croire en argumēs syl-

logistiques. Le vseray de demonstration fondée
& prinse de sens.

PARADOXOLEROS.

Commequoy?

PASQVIL.

Tout medicament qui cōdense le corps, lequel
il touche, & le reserre incōtinent & aussi le red
aspre, icelluy est astringent: ceste est la maieur
irrefragable *ab effectis*. Or le vinaigre condense,
& serre les parties attouchées avec asperité selō
plus ou moins: dont ie conclu que le vinaigre
ha astriction.

PARADOXOLEROS.

Ie nie la mineur, & ta conclusion.

PASQVIL.

Elle est prouuable par le sens. Et quelle instan-
ce pourrois tu faire au contraire?

PARADOXOLEROS.

Telle instance. Que ie dy tout astringent estre
de grosse substance, & nul medicament de sub-
stance tenue n'estre astringēt. Or est le vinaigre
de substāce tenue: Parquoy impossible est qu'il
soit astringent.

PASQVIL.

Or ie te prouue le contraire par vng exemple
de Galen au 6. liure Catatopos chap. 2. ou il
cōpte, que retournāt d'Alexādrie en son pays,
par les champs trouua vng lardinier, lequel e-
stait quasi suffoqué d'une fluxiō, laquelle luy

*Le suc de noix est
subtil et est
astringent*

tomboit sur la bouche: auquel Galen conseilla
qu'il se gargarisast du ius d'escorce de noix ver
des, coulé, & cuit avec miel. Auquel lieu Galé
manifestemēt demōstre le ius d'escorce de noix
verdes, estre fort astringent: iasoit qu'il est de ten
ue substance.

PARADOXOLEROS.

Mais cōment preue Galen ce ius de noix estre
de tenue substance?

PASQVIL.

En telle sorte & euidēte demōstration. Les cho
ses qui penetrent facilement sont de tenue sub
stance, or celluy penetre facilement. Et qu'ainsi
soit. A ceulx qui hōt esqualé les noix, l'asperité,
& noirceur des mains ne s'en va pas incōtinēt,
ores qu'ilz les lauent, & nettoyeut fort. Or ne se
roit il de si difficile nettoiyement, & absterfion:
s'il n'estoit de substance tenue, & neantmoins il
est astringent. Parquoy il est faulx ce que tu as
dict que tout astringent est de grosse substan
ce. Je te dy bien d'avantage. En ce lieu mesme
dict Galen que beaucoup vault l'astriction la
quelle est fondée en substance tenue. Car les a
stringens qui sont de grosse substāce, pour cau
se de leur astriction serrent & condensent la su
perficie du corps auquel ilz sont applicuez,
& cela empesche qu'ilz ne puissent bien pene
trer dedans. Et pour ne pouoir bien penetrer

dedans, ilz ne peuuent aussi bien ayder aux parties enflammées à cause que les parties sont serrées & cōdensées. Cela mesme dict Galen 3. *simplicium. cap. 6.* Puys doncq qu'il conste que le ius d'escorce de noix est de tenue substance, & neantmoins aspre, & astringent, Pourquoy le vinaigre, qui mesmement est froid, au second degré, & sec au tiers degré encore qu'il soit de tenue substance, ne pourra il auoir astriction?

PARADOXOLEROS.

C'est vng argument par le semblable, de tous, le plus infirme & qui cloche d'ung pied.

PASQVIL.

Il ne cloche en rien. Car en tout, & par tout il est de mesme raison & ferme assez. Mais pour plus encore le rēforce le mesme noble auteur Galē 2. lib. *De compositione medicamentorum secundum locos.* dict le vinaigre auoir la faculté repulsoire, aussi attenuatiue, & discussiue, de la maniere mesme q̄ exactemēt tient l'air de bise. Or l'air de bise serre, & cōdēse les corps qu'il rēcōtre. Parquoy la mesme faculte tiēt le vinaigre, & par cōsequent est astringēt. Encore te vueil ie faire vn autre argumēt par les cōtraires.

PARADOXOLEROS.

Or fus doncq?

PASQVIL.

L'operation du medicament froid est cōtraire
à l'operation du medicament chault. Le me-
dicament chault attire ou il est applicque, &
quant & quant relaxe. Parquoy au contraire
le medicament froid resserre, & astrainct les
parties, ou il est applicque. Or est le vinaigre
froid en sa souveraine qualité. Parquoy il est
astrictif. Pour laquelle cause aussi Aristote ap-
pelle le froid en grec *συναγόμενος*, qu'est à dire
condensant, ou retirant: contraignāt ou ferrāt.

PARADOXO L E R O S.

Cela ne fait rien contre moy car ores que le
vinaigre soit froid, neantmoins par cela n'est il
astringent. Car pour autāt qu'il penetre par la
tenuité la partie ou il est applicqué il ouvre les
pores, & par ce ne les condense, ne resserre? car
aultrement seroient deux actes contraires en
vng meisme subiect ce que est impossible.

P A S Q V I L.

Oy bien (comme i'ay deuant dict) *simul & se-
mel*, Mais non pas succesiuelement & à diuers
regardz. Car cōme le vinaigre soit froid pour
le plus, & chault pour le moins: Or le froid en
action est plus pigre, & tardif, mais le chault
plus actif & soubdain à agir: les chauldes &
plus subtiles parties du vinaigre premieremēt
penetrent, & donnent voye aux parties froi-
des à penetrer, & estant penetrées à dedās res-
serrer,

ferrer, cōme le tesmoigne Galē de simp. lib. 4. cap. 12.
Ainsi le vinaigre après sa penetration ne laisse de
restraindre, & ferrer les pores, à cause de sa froidu-
re, & siccité domināte. Car Galen dict. 2. lib. simpl.
cap. 24, la ppriété des choses froides est de cōdēser,
& resserrer. Et des choses chauldes de dilater & fai-
re fondre ou colliquer. Et à ce lieu cōforme Galē
sur Hippocras. de morbis vulgaribus. en parlāt de la
frigidité dict ainsi. La frigidité de sa nature ferre,
cōdēse, ferme & restrainct toutes les choses qu'elle
touche. Et pource icelle frigidité estoupe, & clost
les pores inuisibles, voire aussi les apparens.

PARADOXOLEROS.

Le argumēte au cōtraire par le sens ainsi, Le vīaigre
incide, discute, & ouure les opiliōs, & d'aduāta-
ge il est aigre, non amer, acerbe, ny austere. Il n'ha
doncq' aulcune astrictiō,

PASQVIL.

La consequēce est faulse. Car Galen dict au 3. liure
Simplicium. cap. 7. Es medicamēs, tu trouueras que
ilz hont diuerse qualité ou vertu, & non seullemēt
diuerse, mais aussi cōtraire. Regarde ce q̄ Galē dict
de la Rose, laq̄lle est astringēte, & aussi est douce,
& amere, & si ha q̄lq̄ mordication. Mais pour cela
n'entēds pas, quād Galē dict q̄ la Rose ha astrictiō
meslée avec les aultres saueurs, q̄ pourtāt ladicte ro-
se ayt souueraīne astrictiō. Car si elle auoit astrictiō
extreme: les autres saueurs ne se pourroīēt cōpatir
ensemble. Mais pource q̄lle ha q̄lq̄ astrictiō, cela

D

ne repugne qu'elle ne ayt la mixtion des aultres
saueurs, & qualitez, ainsi cōme Galē le dict 3. *sim-
plicium*. Et non seulement en la rose tu trouueras
cōtraires qualitez mais aussi à la Reubarbe, Aloe,
& plusieurs aultres simples: desquelz les exemples
bailler ie me deporteray pour le present, pour cau-
se de briefueté. Mais cela est selō le moins ou plus,
& ainsi ha le vinaigre aigreur incisiō, & astrictiō,
l'une plus, l'autre moins. Et ainsi combien qu'il in-
cide, penetre, extenue, & ouure les obstructiōs:
pourtāt ne laisse d'auoir astriction, iasoit q nō ex-
treme. Car si elle estoit souueraine, ne pourroit in-
cider, ny extenuer, ny ouurir les oppilations, ny
auoir aigreur.

PARADOXOLEROS.

Tu me Rues tāt de coups, & te couures si finemēt,
que ie ne fay plus quasi de quel baston me ayder.

PASQVIL.

Ie te vueil doncq armer à l'encontre de moy, mais
ce fera à la legiere. Galen semble faire pour toy 1.
Simpl. cap. 5. ou en louant Platon de n'auoir cōfon-
du les saueurs, cōme ceulx qui disoient le poiure
estre des medicamēs astringēs, comme il soit des
acres: & le vinaigre de la nature des medicamens
aigres: parquoy estant des aigres il n'est des astrin-
gens.

PARADOXOLEROS.

C'est cela, cest biē dict. *Santo de Dio*, le l'auois oblié.

PASQVIL.

Non pas oblié, car tu ne le sceuz iamais. Toutefois à ceste autorité ie respōdz par la mesme distinction que dessus, que au vinaigre pour le plus fort domine l'aigreur, pour le moins & plus foible, y est l'astriction. Et vinaigre est il appelé pour la saueur en luy dominante sur toutes. Laquelle Neantmoins ne forclut point l'austerité, ou acerbité.

PARADOXOLER OS.

Vbide hoc?

PASQVIL.

L'experience le monstre. Car le vinaigre mis en la bouche rend la lāgue aspre, retraicte, & seiche. Or toutes choses qui cela fōt, sont estimées de saueur austere, Parquoy le vinaigre ha austerité, & par cōsequent astriction,

PARADOXOLER OS.

Oy par aduenture à ton goust, & nō pas au mien. Et cela me semble impossible. Car le vinaigre de tenue substance, cōme pourroit il auoir austerité, qui est fondée en grosse substance, & l'aigre en la tenue?

PASQVIL.

Ie distīctz icelle saueurs ou simples, ou cōposées? Quant aux simples, ie concede ce que tu dis: quāt aux cōposées, non. Car quand icelles saueurs sont composées, & mixtes, la saueur austere peut estre en chose tenue, pource qu'elle ne laisse pour la tenuité, d'auoir quelques parties terrestres, & seiches. Or dict Galen i. *Simpl. cap. 19.* Au vinaigre cōme

aux autres liqueurs, il y ha vne partie qui corre-
spond aux feces, ou lyes, & celle partie est terrestre.

PARADOXOLEROS.

Oy mais, si tu prens du vinaigre quand il ha long
temps demouré en repos, & tu le mettes en autre
vaisseau, il n'aura point de parties terrestres.

PASQVIL.

Cela est parlé en cuyfinier, nō en medecin. Je m'en
raporte mesme aux alchemistes, & à lehā dru pa-
sticier: car cōme le vinaigre soit corps mixte, & nō
simple, il ne peut estre si pur, qu'il soit du tout pur-
gé de lie, & partie terrestre: outre ce ie vueil vser
d'une similitude prise sur la nature, pour te dōner
à entēdre q̄ le vinaigre outre laigreur ha austerité.
Regarde q̄ tous les fruiets auāt q̄ d'estre meurs sōt
premieremēt acerbes, & puy s'austeres, & par acqui-
sitiō d'humidité deuiennēt puis apres aigres, exce-
ptées les oliues, lesquelles deuiēnent doulces, & nō
pas aigres. Or es fruyets icelle saueur aigre ha telle
affinité avec l'acerbe, & austere: q̄ tu ne trouueras
aucun fruyct lequel soit aigre, qui n'aye quelque
austerité. Sēblablemēt au vinaigre ayant aigreur,
cōbien qu'il soit engēdré par putrefaction, il y ha
q̄lque austerité. Pource disoit Galen 4. *Simpl. cap.*
12. & *Aetius.* en son premier liure, le vinaigre, ou
plustost le vin degenerant en vinaigre se conuertit
en celuy humeur duquel le vin est produict. Or
de l'agreste, viēt le vin, L'agreste ha austerité, dōc q̄

aussi ha le vinaigre encore q̄ nō tā vehemēte cōme
l'agreste, L'agreste est froid, si est le vinaigre, cōbiē
q̄ de pl^r vehemēte froideur. Et cōbiē qu'il soit sou
uerainement froid, si ha il neantmoins q̄lq̄ chaleur
à raison de la putrefaction, & semblablemēt acri
monie: l'agreste ne ha ne chaleur ny acrimonie.
Aussi le vinaigre ha plus de tenues parties, que
l'agreste.

PARADOXOLOS.

Or pour ma derniere main, ie Replicque encore
repellissant le vinagre estre repercussif: & pource
ne pouoir estre astrictif.

PASQVIL.

Ie te dy (cōme i'ay faiēt par auāt) q̄ astrictiō n'est
pas cōtraire à repercussion. Car vng mesme simple
biē souuēt peut estre repercussif, & aussi astringēt,
cōme les galles, le sumach, le vinaigre, & plusieurs
aultres. Et icelluy simple lequel est repercussif &
astringēt ensemble, repercute beaucoup mieulx.
Aussi pourra estre vng medicamēt repercussif leq̄l
ne sera pas astringēt pour cela, cōme l'eau cōmu
ne. Sēblablemēt pourra estre vng astringēt, lequel
pourtāt ne sera repercussif, cōme est l'alū. Les froi
des, & chaudes medicines peuuent estre astringen
tes, mais les medicines repercussiues, fault necessai
remēt qu'elles soient froides. Ainsi q̄ les medeci
nes acerbes, & austeres, sont toutes froides quant à
leur nature. Mais pourtāt tous les astringēs, n'hōt

besoïg d'estre froidz. L'operatiō de la medicine re-
percussive repulsive cōsiste en cecy. Appliquée
en q̄lconq̄ partie, refroidit le mēbre, & le rēd plus
densé, & serre les pores du dict mēbre, & en oste la
chaleur & rēd pl^e espes & gros, l'humour q̄ en doibt
decourir & si empesche q̄ l'humour ne decoure au
mēbre. Et ceste operation principalemēt est faicte
par la medicine repercussive. Mais la medecine
astringēte, soit chaulde ou froide, garde de courir
& couler les superfluitez, pource quelle corrobore
accidētalemēt la vertu du mēbre, auq̄l elle est ap-
pliquée: or la vertu corroborée expellit les choses
nuysantes, es moins nobles parties, & plus foibles
lieux. Dond ceste operatiō principalemēt, & pre-
mierement se faict de nature: & en second lieu par
la medicine en sorte: que la repulsion se reduict
à la disposition du mēbre, & l'astrictiō se reduict
à la vertu corroborée. Et pource il est dict q̄ la me-
dicine astringēte garde q̄ le membre ne recoiue les
superfluitez *gratia trāsmissionis*, & la medicine reper-
cussive *gratia repulsus*. Tellemēt q̄ vng mesme me-
dicament peut corroborer la vertu, & aussi faire
operatiō repercussive. Parquoy ta derniere main
est perdue, & derniere replicq̄ rabbatue, & ne scau-
rois ne deburois plus que dire. Sinon (Cōme fait
Stestichorus.) chanter palinodie, pour amēde hon-
orable, en cōfessant, & recognoissant q̄ Messieurs,
Martin Acakia, Tagault, Houlier, *Vidode vidis*, &
Fuchsius. suyus doctemet la doctrine Galenicque,

hont tresbien dict en attribuāt astriction au vinaigre:laquelle doctrine *Iacobus Syluius* ha enfuyue, & n'en dict iamais le contraire,cōme tu donnes à entēdre,par l'autorité de luy voulāt feire trouuer ta cause bonne.

PARADOXOLEROS.

Vrayemēt ie cognois bien q̄ tu es venu à me assaillir tout preparé,& premedité,& me has biē prins sans verd,tellemēt q̄ ie me sens aussi biē picqué & arrosé de ton vinaigre espagnol:cōme es satyres de Horace le Grec *Persius* se sentit parfumé du vinaigre Italiē du Roy banny *Rupilius*.Mais vne autrefois quād ie seray bien armé ie auray ma reuanche. Adieu.

PASQVIL.

Atten,attē, encore vng peu.Ce n'est pas tout:Ce q̄ nous auons dict,n'ha esté q̄ disputatiō doctrinale du vinaigre.Mais maītenāt ie te vueil parler de toy mesme,& de tes defaulx & vices.Car puy s q̄ en tō paradoxe tu ne has espargné aulcū:ains les has touchéz tous d'iniures,voire atroces,en disāt les medecins de Paris descognoissās,& mauuais praticiēs, vn medecin allemāt Louuenceau, sentāt sa plume folle, vng aultre allemāt aussi inaduertēt,& mauuais traducter,les medecis de lyon estre dissimulateurs,cacheurs de verité,& craīctifz.En particulier appellāt vng medecin lyonnois endormy faulx interpreteur,imposteur,& mēteur,& par ironie allegueur incroyable de memoire diuine, vng aultre

obstiné, & ignorāt, vng aultre lāgagier, vng aultre,
hōme cōuoiteux, vng chirurgiē aueugle mene par
vng aueugle. Et (q̄ pis est) en vne epistre au lecteur
quād tu ferz imprimer vng liure intitule. *De aegritu*
dinibus infantium Pauli Bagelard. En laq̄lle epistre cō-
tra iusiurandum hippocratis leq̄l nous cōmande re-
uerer, nos precepteurs cōme nos peres. Tu appelles
ceulx q̄ iadis hont esté tes maistres à Montpessier,
gēs de grand sauoir & renō maintenāt trespassez.
tu les appelles *Deliros Senes Vieulx* refueurs. Puy
q̄ tu y has ainsi procedé par iniure, la raison veult
le taliō & que tu sois vesperisé sur tes moeurs: Or
escoute doncq tes veritez: & là legende dorée de
tes beaux faictz.

PARADOXOLEROS.

Santo de Dio. Je n'ay pas maītenāt le loisir. J'ay vne
assignation ou il me fault à ceste heure necessaire-
ment trouuer. Pource ie men vay, Adieu.

PASQVIL.

Demeure, demeure, arreste, encore vng mot

PARADOXOLEROS.


Santo de Dio Tu ne me tiendras plus. Adieu.


PASQVIL.

Il sen va, il m'est eschappé, il sen est vollé cōme la
mouche guespe, ayant laissé l'aguillon en la playe
qu'il ha faicte. Mais, Si ie le puis encore tenir vne
fois: il entendra, que ce que ha esté dict n'est que
ieu au pris de ce que nous dirois.

F I N.







had n a ch i m lă la form
la m c m s s t n de p. b ch

II 97
4,8,0

cm 1 2 3 4 5 6 7 8 9 10 11 12 13 14 15 16

RÉ